

摘藻堂四庫全書薈要

集部

欽定四庫全書薈要

集部

御選宋詩卷六十九

詳校官原任主事臣李斯咏



欽定四庫全書蒼要卷一萬八千三百七十六

集部

御選宋詩卷六十九

七言絕句六

王庭珪

山桃花

破臘山桃已盛開
飛花無數點青苔
莫教流水前溪去
引得漁郎入洞來

贈松菴僧

菴在深邨翠嶺坳狂風捲盡屋頭茅斷椽破壁何時理
卧看松陰月轉梢

和讀書堂入夜即事

池底星光箇箇添半鈎斜月吐纖纖數聲寒笛西風下
人在珠樓暮捲簾

次韻劉英臣早春見過

池草青青細吐芽夢回疑到惠連家東風未暇吹桃李
先發寒梅第一花

遊湖頭觀桃花行數里彌望不絕有僧新開蘭
若於萬山之中留三絕句書辯公房 錄一首
十里紅香襯馬蹄更穿林樾訪僧扉煙長草遠望不斷
忽有鐘聲出翠微

漁父

冥冥江雨濕蓑衣夜上高巖宿翠微夢斷一聲煙草綠
遙聞欸乃扣舷歸

次韻陳君授暮春感懷

雨餘山鳥百般啼，煙隔桃蹊一線微。
南北東西春總好，杜鵑何苦勸人歸。

夜坐聽沅江水聲

雨過風林生夜清，坐邀明月正關情。
漁童酒醒莫吹笛，要聽一江秋浪聲。

次韻劉惠直梅花

雪壓寒梢玉作容，嶺頭相見又東風。
人間欲問春消息，半在竹橋溪影中。

茉莉花

纖雲捲盡日西流
人在瑤池宴未休
王母欲歸香滿路
曉風吹下玉搔頭

呂本中

遊北李園

雨映煙籠萬竹蟠
枯條高下不堪看
非千秋後多霜雪
自是芙蓉不耐寒

小徑縱橫出紫苔
綠陰高下綴黃梅
榴花却是多情思

留宿薰風未肯開

東園

暫開還落不停枝
雨濕東園柳絮稀
遙想釣船今夜月
暗隨潮信與春歸

界步河亭

窮山擁翠染人愁
亭下寒溪東北流
寄語扁舟舟上客
為傳消息到筠州

途中久雨乍晴

匝地濃雲散曉風輕寒挾冷下長空攢峰疊嶂來無盡
疑是舟行圖畫中

野岸

淡日輕煙邛徑斜長風捲浪欲浮花夜深隔岸漁舟過
螢火驚飛亂點沙

休寧縣與汪致道諸公別後晚宿黟縣界魚亭
驛

竹密如雲不見天好山無數簇溪田祇應黟縣溪山勝

盡在魚亭驛舍前

水仙

澹綠衣裳白玉膚
近人香欲透衣襦
不嫌破屋颼颼甚
肯與寒梅作伴無

題范才元畫軸後

昔年曾過嶺南州
曾看湘江萬里流
妙手可傳詩外意
亂雲寒木共孤舟

梅花

白玉花頭碧玉枝
水邊林下雪晴時
暗香別有關情處
却是春風未得知

陳與義

和張矩臣水墨梅

粲粲江南萬玉妃
別來幾度見春歸
相逢京洛渾依舊
惟恨緇塵染素衣

自讀西湖處士詩
年年臨水看幽姿
晴窗畫出橫斜影
絕勝前邨夜雪時

秋夜

中庭淡月照三更
白露橫空河漢明
莫遣西風吹葉盡
却愁無處著秋聲

柳絮

柳送腰肢日幾迴
更教飛絮舞樓臺
顛狂忽作高千丈
風力微時穩下來

寶園醉中

一尊相屬莫辭空
報答今朝吹面風
自唱新詩與明月

碧桃開盡雨聲中

春寒

二月巴陵日日風春寒未了怯園公海棠不惜臙脂色
獨立濛濛細雨中

香林

誰見繁香度牖時碧天殘月映花枝
固應撩我題詩句
壓倒韋郎宴寢詩

城上晚思

獨憑危堞望蒼梧
落日君山如畫圖
無數柳花飛滿岸
晚風吹過洞庭湖

和大光道中絕句

寂寂孤邨竹映沙
檳榔迎客當煎茶
嶺南二月無桃李
夾路松開黃玉花

竹

高枝已約風為友
密葉能留雪作花
昨夜嫦娥更瀟灑
又移疎影過窗紗

早行

露侵駝褐曉寒輕
星斗闌干分外明
寂寞小橋和夢過
稻田深處草蟲鳴

沈與求

小雨

小雨廉纖未肯晴
勒回花信待清明
冷官何預芳菲事
空聽春禽作意鳴

會景亭

柳株高下隔桃蹊萬頃煙波似漢陂畫手無人見平遠
小亭風冷立移時

吳江阻雨過豁然閣次周廉彥韻

花鴨呼羣自拍浮何人蓑笠在孤舟半生已負江湖約
不為經行肯暫留

濛濛小雨麥秋天江上人家欲暮煙行客未能忘勝處
繫船來伴白鷗眠

次韻院中四絕句

行盡江山不記村，却隨花信到重門。
也知春色嬌無賴，取次先來綠草根。

一尊相屬語黃昏，密雪飄零正滿門。
記得江橋回馬處，冷香應斷玉梅魂。

要知春色到池塘，深院無人午夢長。
已覺此身便靜樂，自溫檀火炷爐香。

豆蔻梢頭春意濃，輕狂無奈賺花風。
今年撩却尋芳晚，準擬殘枝占晚紅。

石壁寺山房即事

雪根斲翠接山椒，小築初營一束茅。
未放野泉縈曲磴，旋消寒綠引春梢。

望斷南岡遠水通，客檣來往酒旗風。
畫橋依約垂楊外，映帶殘霞一抹紅。

過卞山次韻朱仰止磴亭絕句

曲磴潺潺隱石隄，玉蚪雙引戲晴漪。
相思後夜添清絕，日落山空月半規。

環珮琮琤落斷崖水清石瘦沒平沙幽人散策經過地
草閣柴扉趁水斜

過竹西

百折清灣抱野田竹西風物故依然歸牛更背斜陽去
牧笛一聲吹暮天

次律兄餉魚魚不至而書至輒成絕句

憑虛公子騎鯨後烏有先生控鯉初可是凡魚亦仙去
空餘一紙腹中書

新春書事

早歲驚逢上苑春
蹇驢朝踏落花塵
只今懶問芳菲事
柳眼相看也笑人

程俱

三峰草堂

雨洗千山翠欲浮
稻畦松澗已爭流
朝來風急凝雲盡
歷歷鐘聲過五州

戲題畫卷

五載京塵白鬚鬚丹青遐想寄衡巫如今埽迹長林下
却對真山看畫圖

答和江子我

柳標橫擔入亂山恍如黃鶴倦飛還不妨步履時來往
山北城南一望間

新作紙屏隆師為作山水筆墨略到而遠意有
餘戲題此首末句蓋取所謂柴門鳥雀噪遊子

千里至也

時守秀州屢乞宮
觀歸山居未遂

急雨初收山吐雲清溪曲曲抱煙村拋書午枕無人喚
歸夢真疑鵲噪門

陳淵

離紫溪驛

小風吹面雨廉纖輕薄衣裳懶更添一線離情裁不斷
暮雲將過粵山尖

信州禪月院晚眺

一覺華胥日又曛晚來愁緒亂紛紛角聲對起重城近

吹動靈山萬疊雲

延平林力道閣上觀水

要看春水拍天流更有溪山一日留
誰遣白雲迷眼界
坐令歸思入扁舟

泊舟延平

野塘飄盡喜春歸又見溪桃片片飛
醉卧暖風呼不醒
亂紅無數點人衣

小詩七首寄養蒙兼呈景駿

錄三首

粥魚齋鼓網蛛窠古寺長廊客少過
唯有一溪明月在
夜寒偏向斷垣多

斜陽不到竹陰幽
小徑縈紆傍碧流行到草深橋斷處
却乘明月泛歸舟

太史溪頭十里間
朝陽峰下水涵天
青鞋不踏紅塵陌
夢斷僧窗又一年

山寺早梅

竹籬茅舍近前溪
煙淡風微月上遲
認得暗香來去處

夜寒無路覓橫枝

鄧端友臨要閣五首

錄二首

昔年曾到十三樓，一目西湖十頃秋。寒碧軒中最宜暑，

只緣修竹近清流。

寒碧軒乃西湖上十三樓之一絕，似此景故云。

十里煙波竹外溪，隔溪青嶂繞窗扉。詩人不見東坡老，

直節空餘一尺圍。

東坡詩所謂窗前修竹一尺圍也。

曹勛

端午帖子

朝下仙班曉景遲步搖香認九華妃
花藏窈窕知金屋
亭照回波在翠微

曲檻榴花絳色鮮博山一縷水沈煙
奉華窗戶清無暑
習習香傳遠岸蓮

下直歸來閨苑游椒風高轉紫雲樓
冰盤紋簟清薰細
捲上珠簾白玉鈎

雨後風微荷芰香頓驅初暑作疎涼
黑雲捲盡青天大
却倚湖光看夕陽

宮詞

溥綏聖澤浙江渚風轉行宮赤羽旗責已但書農本詔
乘春豈有宴游詩

六宮上直試羅衣未聽鞭聲等駕時且趁曉閒臨御札
官家常是下朝遲

上聖憂勞昔未聞看花豈復御佳辰內人聞道頻相語
不見秋千已幾春

天開黃道日華明細細南薰下太清宮殿雲扶龍虎氣

樓臺風轉筦絃聲

禁直賦所見荼蘼

密葉素華青羽帔繁香秀色六銖衣枕間為插琉璃滿
清夢泠泠入翠微

禁直偶作

寓直承明意味清風傳禁漏作春聲梅梢影轉三更月
身在蓬壺夢不成

和何季崇僉判

羈思登臨已怯秋
紫萸黃菊更添愁
海光不動暮山紫
人在天涯空倚樓

和范倅

巖壑未消連夜雪
松篁深映一川梅
忍寒故作遲遲去
只為清香特特來

和蘇養直題孫郎中扶疎堂

白項鴉兒趁曉啼
梢梢寒柳出疎籬
未飛臘雪連天白
且看江雲四面垂

題扇

霏微梅雨暗林塘潤逼琴絲草木香捲箔鈎簾無一事
篆煙終日伴清涼

薰風過雨到池臺綠蔭都無一點埃傍架垂垂薇露重
糝枝已有橘花開

草縈平碧柳舒金春色融融積漸深巢燕高低尋畫棟
宿雲濃淡作輕陰

瀾瀾水檻俯橫橋水面新荷影動搖時向青空飛白鷺

不妨翡翠立蘭苔

春去煙光綠已齊
陰陰攔檻曉晴時
新梢葉暗殘芳盡
喜見餘花一兩枝

弄袖和風拂拂輕
衆香迎面酒微醒
涼尋小徑通幽處
花壓闌干竹一亭

小軒風景畫圖寬
一再閒尋綠綺彈
雨著梨花春已老
煙沈芳草夢猶寒

殘春已去不堪招
猶喜鶯聲破寂寥
花片片飛風弄蝶

柳陰陰下水平橋

雨餘湖上數峰青湖水連天似鏡平
一棹迎涼快襟袖香從蘋末晚風生

燕尾溪頭晚色分蜂腰山斷日斜曛
半篙碧靜秋垂釣一棹黃昏冷載雲

題俞槿畫

浙江觀潮

吳越山高紫翠重浙江東下竦雙峰
峰前忽湧東西白

飛舞潮頭萬玉龍

吳松秋遠

蕭蕭木葉下西山便覺尊鱸興不閑
莫踏長虹千尺去孤帆正在暮雲間

海門夕照

秋濤初過靜魚龍海納斜陽萬頃紅
待向焦山留夕月一帆猶記挂西風

鄂渚晴光

上下天光一碧時
白蘋紅蓼照晴暉
漢陽樹遠江煙起
黃鶴樓空燕子歸

雜詩

孤山不復訪林逋
杖策東風踏碧蕪
九里蒼雲行曉徑
四圍碧玉照晴湖

飛去鶯兒黃一點
壓低梅子綠團枝
鈎窗捲箔涼生坐
但覺新陰轉影遲

問西湖梅

山肋梅花秀色新不堪寒雨泥清塵故應倒影澄瀾碧
濕玉吹香爛漫春

夏日偶成

田田秧稻半青黃比屋人家煮蠶香新綠侵人襟袖爽
滿川煙水助清涼

雨過梅黃五月天風林密處漸聞蟬直須破浪銷煩暑
一頃波光一棹煙

朱松

石門寺

橘刺藤梢冒客衣
直緣微祿得奔馳
懸知投老歸田味
只似登山困睡時

林棲相喚出幽谷
我亦欲起天未明
枕中泱泱響山溜
一似荒城長短更

宿石龍寺

觸處為家底是歸
浮生南北未忘機
道人身似南枝鵲
更盡秋宵一再飛

句道人之玉山戲作小詩送之

道眼無塵萬景隨
滄江秋色入新詩
歸時人間江南好
只道君行到自知

和幾叟秋日南浦絕句簡子莊寄幾叟

兩翁相對語更闌
想見風生席石間
詩就南枝三轉鵲
樽前秋月半銜山

風雨交交耿夜燈
天涯兄弟對牀聽
莫嫌詩作江南語
一夢家山眼亦青

雜詩

身將雙影背閩山伴我江南去又還欲寄道人簷下宿
此身都未似雲間

題范才元湘江喚舟圖用李居仁韻

天涯投老鬢驚秋夢想長江碧玉流忽對畫圖揩病眼
失聲便欲喚歸舟

送周時用自別業還永嘉

陌上花殘客未歸故鄉自合去遲遲紅香洲渚收歸槩

却勝池塘草綠時

梅花

霜谿咽絕照冰姿誰見無人弄影時
香逐曉風穿暗戶
夢隨落月挂寒枝

題蛟灣小菴

鑿破蒼崖俯碧流石碕竹筏艤行舟
已邀明月來同宿
下數層瀾寸寸秋

朱棹

草堂諸陳同遊崧山精舍冕仲攜琴先歸用璧
間韻

破塵妙語慰畸人鶴綠深衣雨墊巾
獨自抱琴山下去
石橋月色為誰新

三山次鄭德予韻

日脚微明雨脚踈誰將雲夢賦相如
西南山好君知否
一見全勝讀異書

次韻梅花

一月尤溪煙雨濃
玉梅渾作玉人逢
江南他日摘香處
莫忘雲間雙髻峰

清淺灣環繞故牆
一身將影理殘妝
西施浴處無人見
冷落吳宮溪水香

延平道中

一溪春漲午晴初
日透波光綠浸裾
却憶孤山山下路
石橋清澈看叉魚

鄭剛中

陝西戲成二絕

錄一首

出門上馬雖所樂乍見秋風亦念家
何日隋堤霜後路
亂飛榆柳踏平沙

早行

風柳驚霜日夜飄
客程中夜馬蕭蕭
據鞍髣髴如殘夢
曉月一鉤猶未消

頰肩攜擔又催程
寸許孤燈照壁青
破縣殘更誤傳曉
馬行十里見明星

靈壁驛有方公美少卿留題戲和於壁

君把使旌臨洛水我參樞幕過潼關
秋風想見吹歸渡
先看淮南第一山

雨過

雲壓江邊草樹低
麥搖秋色望中迷
却知向晚有晴意
雨過一聲村落鷄

懷山居二絕

春淺酒寒人密坐
花深雨細蝶移枝
十年未解作歸計

此恨故園鶯自知

披叢尋得晚花瘦帶雨剪來春
韭香憶把餘曛付松枕
明朝春夢不勝長

夜燭花

蠟炬香光照夜紅垂垂簾幕靜無風
金盤五寸花成穗
可但釵頭綴玉蟲

無題

池塘好處煙迷柳簾幙昏時雨過
山燕子不知春有恨

銜將花片入梁間

即事

小徑客來穿竹入
草亭涼到枕書眠
鳥呼人笑荔枝熟
如此封州已二年

渡胡源口

暫出篋輿上小航
眼明重喜見江鄉
夢魂孤寄浪頭宿
一夜隨潮入富陽

即事

暮春景物稱山家屋角團團綠葉遮薄晚微雲疎過雨
一番小麥顫輕花

高登

病中雜興

長袖深藏批勅手短筇斜倚作詩肩有時極目睨遼漢
興在孤鴻落照邊

張綱

戲題所見

破睡輕風透碧紗
寶釵聊插任欹斜
欲尋女伴嬉遊去
試問秋千有幾家

次韻李道士觀南山

柴門無事晝慵開
杖屨誰曾得得來
隔岸野花隨處發
護巢幽鳥傍林回

從丁世叔覓花栽

老去看花能幾回
旋移花樹著行栽
君家封殖滿煙露
分我一枝春色來

胡銓

買愁村

北往常思聞喜縣南來怕入買愁村
區區萬里天涯路野草芳煙正斷魂

張九成

夏日即事

萱草榴花照眼明
楸枰水閣晚風清
蕭然終日無人到
簾外時聞下子聲

陰陰庭院靜無聲，只有黃鸝繞樹鳴。
午睡覺來何所見，玉爐風細碧煙橫。

二月八日偶成

今年春色可勝嗟，二月山中未見花。
長憶去年今夜月，海棠花影到窗紗。

黃公度

早春紅梅盛開有感

不與雪霜分素艷，却隨桃杏競芳辰。
自知孤潔羣心妬。

故著微紅伴早春

白沙夜聞灘聲

錯認松風萬壑傳又如急雨碎池蓮
青燈孤館元無寐
况復溪聲到枕邊

題須江驛詩後

歸來已負百花期間拂塵埃看舊詩
極目平蕪二千里
鄉心惟有杜鵑知

題潮陽石埭寺

投檄真成出瘴鄉
籃輿漸喜到僧坊
長風解事吹江雨
乞與行人五月涼

分水嶺

嗚咽泉流萬仞峰
斷腸從此各西東
誰知不作多時別
依舊相逢滄海中

劉子翬

新灣

萋萋寒生水面煙
吳歌唱罷月微偏
停撓又向灣前宿

一夜西風浪打船

汴隄

參差歌吹動離舟
宮女張帆信浪流
轉盡柳隄三百曲
夜橋燈火看揚州

天迴

天迴孤帆隱約歸
茫茫殘照欲沈西
寒鴉散亂知多少
飛向江南一樹棲

銅雀臺

金碧銷磨瓦面星亂山依舊繞宮城
路人休唱三臺曲
臺上而今春草生

景陽鐘二首

景陽鐘動曉寒清
度柳穿花隱隱聲
三十六宮梳洗罷
却吹殘燭待天明

一弓殘月淡觚稜
遙望林梢曉色升
寂寞小簾風露冷
玉盆脂水已生冰

寒澗

林間幽鳥啄枯槎落盡寒潮一澗沙
獨木橋西遊子宿
酒旗斜日兩三家

兩山

渡南渡北兩山遙隔岸行人手可招
日暮海門煙雨黑
一川舟楫趁歸潮

得冲佑命

幾年歸夢水雲間
猿鶴重尋已厚顏
慚媿君恩猶竊祿
官銜偏帶武夷山

悠然堂和致明絕句

清霜一夜倒蒹葭
放出湖光徹遠沙
漠漠浮煙收欲盡
晚風輕浪蹴銀花

燕子

燕子營巢得所依
銜泥辛苦傍人飛
秋風一夜驚桐葉
不戀雕梁萬里歸

有懷

風驚枯葦白花浮
欲下橫塘晚更留
惆悵不逢吳季子

一溪寒水帶煙流

吳公路公

松底柴門盡日關
主人西去幾時還
長鑿委地黃精老

時有寒猿嘯硯山

傅茂元

曾訪高人上翠峰
至今清興逐松風
籃輿夢想行山處

白葛花開細雨中

密菴

約致明入開善不至

喬松翠竹鎖禪關
乘興時來興盡還
懊恨劉郎招不得
瘦筇獨自入寒山

次韻六四叔村居即事

飯了呼童疊石門，雨餘幽事不勝繁。
花殘何用深惆悵，梧竹新陰又滿園。

田家

長空淡淡如雲掃，暮過田家風物好。
畊犁倚戶寂無人，飢牛卧嚙牆根草。

題靈鷲窗

翠合初疑無路往，停鞭邂逅成清賞。
僧爐坐穩紙窗明。

細雨忽來山竹響

沙頭

沙頭鷗鷺寒相傍
老樹槃跚枝拂浪
前村急雨漲灘流
日暮漁舟撐不上

羅彥從

送劔南王守歸

未把陽關三疊吟
且將詩句寫離心
千尋浩浩鐔溪水
別恨不知誰淺深

羅願

茶巖

巖下纔經昨夜雷
風爐瓦鼎一時來
便將槐火煎巖溜
聽作松風萬壑迴

王銍

梅花十二題

錄二首

風前

清香自滿不因風
花氣迷人處處同
祇與吹開又吹落

春愁已在笛聲中

水邊

雪後溶溶嫩水通
滿枝煙雨暗春風
試看照影橫斜處
渾似靚妝清鏡中

墨君十詠

錄二首

露葉

秀色娟娟自出塵
曉枝更帶露華新
清風一至如相語
從此開簾來故人

舞月

江樓月下夜聞歌不奈忠州刺史何
輕嫋腰肢更清峭
柳枝何似竹枝多

芳草

會時曾見梅籠雪
別夜常懷月照沙
到底多情是芳草
長隨離恨遍天涯

雪晴閑渡西溪

雪後孤邨一段煙
晴光遠射玉山川
酒旗隔岸招間客

獨上西溪渡口船

泉聲

娟娟山月半巖明
樓殿霜重夜氣清
誰把玉琴來寫取
松風吹斷夜泉聲

上方

松間清月佛前燈
菴在孤峰更上層
犬吠一聲秋意靜
敲門時有夜歸僧

夜晴

雨脚初收天意晴
西風搖落夜寒清
披衣自起開窗戶
落月一山高下明

蘇雲卿

還張德遠書幣題詩
蔬圃壁間

多年別作一番風
誰料聲名達帝聰
自有時人求富貴
莫將富貴污蘇公

范浚

遊赤松觀

靈祠丹井餘真跡祠下老松森百尺仙子騎鯨去不歸
癡人猶問山中石

寇國寶

題閭門小寺壁

黃葉西陂水漫流蘆篠風急滯扁舟夕陽冥色來千里
人語雞聲共一丘

陸永仲

絕句口占

岳南之館白雲端鳳笛龍簫徹廣寒一鶴曉飛沖碧落
羣仙笑倚玉闌干

沈東

遊滄浪亭

草蔓花枝與世新登臨空復想清塵只今惟有亭前水
曾識春風載酒人

周必大

道中憶胡季懷

珍重臨分白玉卮
醉中那暇說相思
天寒道遠酒醒處
始是憶君腸斷時

送蔡德輝程教授

晚折臺城楊柳枝
夕登瓜步佛狸祠
請君收拾江山助
歸和薰風殿閣詩

入直召對選德殿賜茶而退

綠槐夾道集昏鴉
勅使傳宣坐賜茶
歸到玉堂清不寐
月鉤初上紫薇花

送梁山長老智顯

秦人溪畔漢人山萬木參天六月寒
寫向湯休詩句裏
老夫要作畫圖看

三月三日適值清明會客江樓共觀並蒂魏紫
偶成小詩約坐客同賦

上巳清明共一時魏花開處亦連枝
前身應是唐宮女
猶記昭容雙袖垂

修禊歸來却踏青臨流謀野兩關情
不如省事游春女

桃葉渚邊看水生

中秋古梅盛開次子中兄元韻

抱甕畦夫破井苔炎天日日灌陳芟預支春夜無聲雨
贏得冰花帶葉開

端午帖子二首

皇帝閣

水殿開筵酒汎蒲冰盤進膳黍纏菰六宮莫度新翻曲
只詠明州瑞麥圖

太上皇后閣

聚遠樓前面面風冷泉亭下水溶溶人間炎熱何曾到
真是瑤臺第一重

尤袤

題雲海寺

亭前山色繞危闌亭下波濤直浸山波上漁舟亭上屋
相看渾在畫圖間

范成大

題山水橫看二首

煙山漠漠水漫漫老柳知秋渡口寒
盡是西溪腸斷處
憑君將與故人看

霜入丹楓白葦林橫煙平遠暮江深
君看雁落帆飛處
知我秋風故國心

浙江小磯春日

客裏無人共一杯故園桃李為誰開
春潮不管天涯恨
更捲西興暮雨來

曉行官塘驛

篝燈驛吏喚人行
寥落星河向五更
馬上誰驚千里夢
石頭岡下小車聲

春晚即事

屋頭清樾暗荆扉
紫萼斑斑翠莢肥
春晚軒窗人獨困
日長籬落燕雙飛

春晚

陰陰垂柳閉朱門
一曲闌干一斷魂
手把青梅春已去

滿城風雨怕黃昏

客去鈎窗詠小詩
遊絲撩亂柳花稀
微風盡日吹芳草
蝴蝶雙雙貼地飛

夕陽槐影上簾鈎
一枕清風夢昔遊
夢見錢塘春盡處
碧桃花謝水西流

題畫卷

敲傾棧路繞山明
隔隴人家犬吠聲
無限白雲堆去路
不知誰識許宣平

晚潮

東風吹雨晚潮生
疊鼓催船鏡裏行
底事今年春漲小
去年曾與畫橋平

一篙

一篙新綠浦東西
雪絮漫江雁不飛
宿雨纔晴風又轉
片帆那得及時歸

碧瓦

碧瓦樓頭繡幕遮
赤欄橋外綠溪斜
無風楊柳漫天絮

不雨棠梨滿地花

晚步

排門簾幙夜香飄
燈火人聲小市橋
滿縣月明春意好
旗亭吹笛近元宵

楓橋

朱門白壁枕灣流
桃李無言滿屋頭
牆上浮圖路傍堠
送人南北管離愁

橫塘

南浦春來綠一川
石橋朱堦兩依然
年年送客橫塘路
細雨垂楊繫畫船

胥口

扁舟拍浪信西東
何處孤帆萬里風
一雨快晴雲放樹
兩山中斷水粘空

山徑

高景山

雲根新徑絡山腰
暗綠交陰宿霧飄
行到竹深啼鳥鬧
鵝鳩老怨畫眉嬌

斑駁

斑駁別後月纖纖
門外疎桐影畫簾
留下可憐將不去
西風吹上兩眉尖

自天平嶺過高景菴

卓筆峰前樹作團
天平嶺上石成關
綠陰匝地無人過
落日秋蟬滿四山

晚步西園

料峭輕寒結晚陰
飛花院落怨春深
吹開紅紫還吹落

一種東風兩樣心

五月聞鶯

桑陰淨盡麥頭齊
江上聞鶯每歲遲
不及曉風鴨鵝子
迎春啼到送春時

桐廬

濕雲垂野淡疎林
十日山行九日陰
梅子弄黃應要雨
不知客路已泥深

昌化

雙溪館
絕景也

翠染南山擁縣門一洲橫截兩溪分長官日永無公事
卧聽灘聲看白雲

拄笏亭晚望

林泉隨處有清涼山繞闌干客自忙溪雨不飛虹尚飲
亂蟬高柳滿斜陽

次韻樂先生吳中見寄

送春濛雨漲蘋灘荷葉田田柳絮闌想見垂虹三萬頃
拍天湖水釣絲寒

次韻馬少伊郁舜舉寄示同游石湖詩卷七首

錄二首

鏡面波光倒碧峰半湖雲錦萬芙蓉去年蕩槩香風裏
行傍石橋花正濃

得得來題小隱詩拂花縈柳畫船移湖邊好景春猶未
須到秋清月滿時

社日獨坐

海棠雨後沁臙脂楊柳風前撚綠絲香篆結雲深院靜

去年今日燕來時

春日

藥欄花暖小牖眠
雪白晴雲水碧天
煮酒青梅寒食過
夕陽庭院鎖鞦韆

西窗一雨又斜暉
睡起薰籠換夾衣
莫放珠簾遮洞戶
從教燕子作雙飛

雙鯉無書直萬金
畫橋新綠一篙深
青蘋白芷皆愁思
不獨江楓動客心

初入湖南醴陵界

崖樹陰陰爽暝途
出山歡喜見平蕪
一春客夢飽風雨
行盡江南聞鷓鴣

初見山花

三日晴泥尚沒鞞
幾將風雨過年華
湘東二月春纔到
恰有山櫻一樹花

酒邊

日長繡倦酒紅潮
閒束羅巾理六么
新樣築毬花十八

丁寧小玉慢吹簫

羅江

嶺北初程分外貪
驚心猶自怯晴嵐
如何花木湘江上
也有黃茅似嶺南

鄰山縣

山頂嘘雲黑似煙
修篁高柳共昏然
鳥啼一夜勸歸去
誰道東川無杜鵑

三月二日北門上馬

新街如拭過鳴騶芍藥酴醿競滿頭十里珠簾都捲上
少城風物似揚州

發合江數里寄揚商卿諸公

臨分滿意說離愁草草無言祇淚流船尾竹林遮縣市
故人猶自立沙頭

淳熙五年四月二日直玉堂懷舊

桂海冰天老歲華直廬重上玉皇家當年曾識青青鬢
惟有東牆一架花

自閭門騎馬入越城

斷橋墮岸數家邨
雨少晴多減漲痕
雪白鷺兒綠楊柳
日高猶自掩柴門

立秋後二日汎舟越來溪

西風初入小溪帆
旋織波紋縐淺藍
行入鬧荷無水面
紅蓮沈醉白蓮酣

一川新漲熨秋光
挂起篷窗受晚涼
楊柳無窮蟬不斷
好風將夢過橫塘

自橫塘橋過黃山

陣陣輕寒細馬驕
竹林茅店小帘招
東風已綠南溪水
更染溪南萬柳條

自育王過天童松林三十里

竹輿窈窕入蕭森
逗雨梳風冷客襟
翠錦屠蘇三十里
不知脚底白雲深

玉麟堂會諸司觀牡丹醪醑

東風微峭護餘春
紅紫香中酒自溫
不用忙催銀燭上

酴醾如雪照黃昏

洛園姚魏碧雲愁
風物江東亦上游
憶起遨頭八年夢
彭州花檻滿西樓

古梅

孤標元不鬪芳菲
雨瘦風皺老更奇
歷倒嫩條千萬蕊
只消疎影兩三枝

元夕

粉痕紅點萬花攢
玉氣珠光寶月團
簾箔通明香似霧

東風無處著春寒

謂吳中剪羅琉璃二燈

初夏三絕呈游子明王仲顯

錄二首

東君不解惜芳菲
料峭寒中一夢非
非剪盡牡丹梅子綻
何須風雨送春歸

一簾芳樹綠蔥蔥
蝴蝶飛來覓綺叢
雪白茶蘼紅寶相
尚攜春色見薰風

四時田園雜興六十首

并序 錄二十八首

淳熙丙午沈疴少紓復至石湖舊隱野外即事輒

書一絕終歲得六十篇號四時田園雜興

柳花深巷午雞聲
桑葉尖新綠未成
坐睡覺來無一事
滿窗晴日看蠶生

土膏欲動雨頻催
萬草千花一餉開
舍後荒畦猶綠秀
鄰家鞭筍過牆來

高田二麥接山青
傍水低田綠未畊
桃杏滿村春似錦
踏歌推鼓過清明

社下燒錢鼓似雷
日斜扶得醉翁回
青枝滿地花狼籍

知是兒孫鬪草來

寒食花枝插滿頭
倩裙青袂幾扁舟
一年一度遊山寺
不上靈巖即虎邱

桑下春蔬綠滿畦
松心青嫩芥臺肥
溪頭洗擇店頭賣
日暮裏鹽沽酒歸

右春日田園雜興

紫青萼菜卷荷香
玉雪芹芽拔薤長
自擷溪毛充晚供
短篷風雨宿橫塘

前裙水滿綠蘋洲上已微寒懶出遊薄暮蛙聲連曉鬧

今年田稻十分秋

吳下以上已蛙鳴則知無水災

新綠園林曉氣涼晨炊早出看移秧百花飄盡桑麻小
夾路風來阿魏香

茅針香軟漸包茸蓬櫚甘酸半染紅采采歸來兒女笑
杖頭高挂小筠籠

雨後山家起較遲天窗曉色半熹微老翁敲枕聽鶯轉
童子開門放燕飛

海雨江風浪作堆時新魚菜逐春回
荻芽抽筍河鮪上
棟子開花石首來

右晚春田園雜興

二麥俱秋斗百錢田家喚作小豐年
餅爐飯甑無飢色
接到西風熟稻天

百沸綠湯雪湧波
綠車嘈囀雨鳴蓑
桑姑盆手交相賀
綿壘無多絲壘多

晝出耘田夜績麻
邨庄兒女各當家
童孫未解供耕織

也傍桑陰學種瓜

黃塵行客汗如漿
少住儂家漱井香
借與門前磐石坐
柳陰亭午正風涼

千頃芙蕖放棹嬉
花深迷路晚忘歸
家人暗識船行處
時有驚忙小鴨飛

右夏日田園雜興

朱門巧夕沸歡聲
田舍黃昏靜掩扃
男解牽牛女能織
不須徼福渡河星

靜看簷蛛結網低無端妨礙小蟲飛
蜻蜒倒挂蜂兒窠
催喚山童為解圍

中秋全景屬潛夫
棹入空明看太湖
身外水天銀一色
城中有此月明無

租船滿載候開倉
粒粒如珠白似霜
不惜兩鍾輸一斛
尚贏糠覈飽兒郎

細擣橙齏買鱸魚
西風吹上四腮鱸
雪鬆酥膩千絲縷
除却松江到處無

右秋日田園雜興

斜日低山片月高
睡餘行樂繞江郊
霜風掃盡千林葉
閒倚筇枝數鶴巢

松節然膏當燭籠
凝煙如墨暗房櫳
晚來拭淨南窗紙
便覺斜陽一倍紅

放船閒看雪山晴
風定竒寒晚更凝
坐聽一篙珠玉碎
不知湖面已成冰

楫拙無煙雪夜長
地爐煨酒煖如湯
莫嗔老婦無盤釘

笑指灰中芋栗香

黃紙蠲租白紙催
皂衣傍午下鄉來
長官頭腦冬烘甚
乞汝青錢買酒迴

邨巷冬年見俗情
鄰翁講禮拜柴荆
長衫布縷如霜雪
云是家機自織成

右冬日田園雜興

送遂寧何道士自潭湘歸蜀

書劍飄然席未溫
火雲撲地暑煙昏
山黃水濁湖南路

竹月荷風憶范村

題秋鷺圖

昨夜新霜冷釣磯
綠荷消瘦碧蘆肥
一江秋色無人問
盡屬風標兩雪衣

題朱元暉吳興山水橫卷

道場山麓接何山
影落苔溪浸碧瀾
只欠荷花三十里
橈頭船上把魚竿

夜雨

燭花垂穗伴空齋
心事如灰入壯懷
老倦更闌惟熟睡
任他疎雨滴空階

壽櫟堂枕上

禪堂初著小山屏
夜久秋涼枕席清
繞鬢飛蚊妨好夢
卧聽簷雨入池聲

重送文處厚因寄蜀父老

下峽東歸十五年
因君話舊意茫然
煩將遠道悠悠夢
直到天西暑雪邊


聞石湖海棠盛開亟攜家過之


家人扶上錦城頭
蜂蝶團中爛漫遊
報答春光須小醉
紅雲洞裏按伊州

低花妨帽小攜筇
深淺胭脂一萬重
不用高烧銀燭照
暖雲烘日正春濃

御選宋詩卷六十九

謹案第三十九頁後七行青蘋白芷皆愁思刊本
芷訛蕊據石湖集改





總校官庶吉士臣侍朝

校對官檢討臣蕭九成

騰錄舉人臣張昱

欽定四庫全書薈要

集部

御選宋詩卷七十

詳校官原任主事_臣李斯咏

欽定四庫全書蒼要卷一萬八千三百七十七

具部

御選宋詩卷七十

七言絕句七

陸游

倚闌

故山未敢說歸期十口相隨又別離
小雨初收殘照晚
闌干西角立多時

大安病酒留半日王守復來招不往送酒解醒

因小飲江月館

江驛春醒半日留更煩送酒為扶頭柳花漠漠嘉陵岸
別是天涯一段愁

讀書

面骨崢嶸鬢欲疎退藏只合卧蝸廬自嫌尚有人間意
射雉歸來夜讀書

青邨寺

十年淹泊望修門臨水登山幾斷魂短鬢星星身欲老

小樓微月宿青邨

花時遍遊諸家園

為愛名花抵死狂，只愁風日損紅芳。
綠章夜奏通明殿，乞得春陰護海棠。

翩翩馬上帽簷斜，盡日尋春不到家。
偏愛張園好風景，半天高柳卧溪花。

絲絲紅萼弄春柔，不似疎梅只慣愁。
常恐夜寒花索寞，錦茵銀燭按涼州。

飛花盡逐五更風不照先生社酒中
輸與新來雙燕子

銜泥猶得帶殘紅

今年二月二日社而海棠已過

海棠已過不成春
絲竹淒涼鎖暗塵
眼看燕脂吹作雪
不須零落始愁人

雨中山行至松風亭忽澄霽

煙雨千峯擁髻鬟
忽看青嶂白雲間
卷藏破墨營丘筆
却展將軍著色山

城南尋梅

黯淡江天雪欲飛，竹籬數掩傍苔磯。
清愁滿眼無人說，折得梅花作伴歸。

梅花絕句

蜀王小苑舊池臺，江北江南萬樹梅。
只怪朝來歌吹鬧，

園官已報五分開。

成都合江園蓋故蜀別苑梅最盛自初開日監官報府至開五分則府主

來宴游人

亦競集

池館登臨雪半消，梅花與我兩無聊。
青羊宮裏應如舊，

腸斷春風萬里橋。

園中雜書

殘花委地筍掀泥香椀詩囊到處攜幽夢欲成誰喚覺
半窗斜日鷓鴣啼

楚城

江上荒城猿鳥悲隔江便是屈原祠一千五百年間事
只有灘聲似舊時

采蓮

雲散青天挂玉鉤石城艇子近新秋風鬟霧鬢歸來晚

忘却荷花記得愁

別建安

楚澤吳山已慣行
武夷從昔但聞名
北巖小寺長汀驛
且喜遊山第一程

欵帽揚鞭晚出城
驛亭燈火向人明
多情葉上蕭蕭雨
更把新涼送客行

夏日晝寢夢遊一院
聞然無人簾影滿堂
惟燕跼箏絃有聲覺
而聞鐵鐸風響璆然
殆所夢也

即因得絕句

桐陰清澗雨餘天
簷鐸因風破晝眠
夢到畫堂人不見
一雙輕燕蹴箏絃

聞雁

過盡梅花把酒稀
薰籠香冷換春衣
秦關漢苑無消息
又在江南送雁歸

感舊絕句

鶯黃酒邊綠荔枝

鶯黃廣漢酒名
綠荔枝出叙州

摩訶池上納涼時
冰

紈不畫驂鸞女却寫江南白紵辭

十月新霜兔正肥佳人駿馬去如飛
纖腰嫋嫋戎衣窄學射山前看打圍

焚香晝睡比覺香猶未散戲作

小屏煙樹遠參差吏散身閒與睡宜
誰似爐香念幽獨伴人直到夢回時

感昔

常記東園按舞時春風一架晚薔薇
尊前不展鴛鴦錦

只就殘紅作地衣

成都小東門外趙氏園

無題

山繭修着淡薄妝
丁東環珮立西廂
人間浪作新秋感
銀闕瓊樓夜夜涼

秋日聞蟬

斷角斜陽觸處愁
長亭搔首晚悠悠
世間最是蟬堪恨
送盡行人更送秋

湖邨月夕

錦城曾醉六重陽回首秋風每斷腸最憶銅壺門外路
滿街歌吹月如霜

金尊翠杓猶能醉狐帽貂裘不怕寒安得驂騑三萬疋
月中歌吹渡桑乾

晨起閒步

飛紅掠地送春忙嫩綠成陰帶露香聽徹曉天鶯百轉
却隨飛蝶度橫塘

初冬雜題

勲業文章意已闌暮年不足是江山江南寺寺樓堪倚
安得身如杜牧閒

雜興

鰻井初生一縷雲鮑郎山下雨昏昏艣聲嘔軋秋空曉
水際人家尚閉門

宿石帆山下

繫船禹廟醉如泥投宿漁家月向低濕翠撲人濃可掬
始知身在石帆西

泊舟

蘸岸煙波樣畫船
幅巾蕭散餞流年
兩行楊柳吹晴雪
只著啼鶯未著蟬

園中絕句

溪北溪南飛白鷗
夕陽明處見漁舟
憑誰為剪機中素
畫取天涯一片秋

曉雨

東風吹雨送殘春
冉冉年光次第新
君看枝頭如許綠

爭教桃李不成塵

秋晚思梁益舊遊

幅巾筇杖立籬門
秋意蕭條欲斷魂
恰似嘉陵江上路
冷雲微雨濕黃昏

春晚邨居雜賦絕句六首

錄二首

作堤蜿蜿六百尺
西崦東邨成一家
春雨乍晴桑吐葉
秋風初冷稻吹花

澆書滿挹浮蛆甕
攤飯橫眠夢蝶牀
莫笑山翁見機晚

也勝朝士一生忙

東坡謂晨飲為澆書李
黃門謂午睡為攤飯

秋日郊居八首

錄四首

山雨霏微鴨頭水
溪雲細薄魚鱗天
幽尋自笑本無事
羽扇筇枝上釣船

行歌曳杖到新塘
銀闕瑤臺無此涼
萬里秋風菰菜老
一川明月稻花香

秋日留連野老家
朱槃鮓鬻粲如花
已吹蠹散真珠米

更點丁坑白雪茶

蠹散米名
丁坑茶名

魚鹹滿缶酒新筍處處吳歌起壘頭上客已隨新雁到

晚禾猶待薄霜收

剡及諸暨人以八月來水鄉助
穫謂之上客以其來自山中也

汎舟觀桃花

花溼二月桃花發霞照波心錦裏山說與東風直須惜

莫吹一片落人間

花溼桃花
最盛處也

桃源只在鏡湖中影落清波十里紅自別西山海棠後

初將爛醉答春風

自梅仙塢至
花溼恰十里

齋中雜題

列屋蛾眉不足誇，可齋別自是天涯。
閒將西蜀團窠錦，自背南唐落墨花。

懷舊

狼煙不舉羽書稀，幕府相從日打圍。
最憶定軍山下路，亂飄紅葉滿戎衣。

春晚感事

寒食梁州十萬家，鞦韆蹴踘尚豪華。
犢車輾轆歸來晚，爭碾平蕪入亂花。

沈園

城上斜陽畫角哀
沈園非復舊池臺
傷心橋下春波綠
曾是驚鴻照影來

贈鷺

雪衣飛去莫怱怱
小住灘前伴釣篷
禹廟蘭亭三十里
相逢多在暮煙中

新寒

碧蝶飛飛過短籬
山薑石竹有殘枝
誰知老子閒眠處

却是新寒細雨時

安石榴房初小折南天竺子亦微丹新寒漠漠偏欺老

睡起無風怯倚闌

南燭草本俗謂之南天竺李端
叔取以名僧軒蓋用俗語也

龜堂雜興

曳杖東岡信步行夕陽偏向竹間明丹楓吹盡鴉聲樂
又得霜天一日晴

舟中作

會稽城上角鳴鳴日落煙邨暝欲無千載虛名笑張翰

一官元不直尊鱸

夜泊湖中

水鴨鷓鴣拍拍飛
菰蒲深處弄煙霏
喚回二十年前夢
半醉姑溪棹月歸

落葉

萬瓦清霜伴月明
卧聽殘漏若為情
無端木葉蕭蕭下
更與愁人作雨聲

夏初湖邨雜題

市遠春深客到稀
草堂終日掩柴扉
釀成新蜜蜂兒靜
分盡殘泥燕子歸

秋夜

庭院蕭條夜氣清
卧聽宮漏下宮城
旅懷生怕還鄉夢
畱取殘燈伴雨聲

春日絕句

吏來屢敗哦詩興
雨作常妨載酒行
忽見家家插楊柳
始知今日是清明

故園蛺蝶最多種
百草長時花亂開
窮巷春風元不到
一雙誰遣過牆來

桃李吹成九陌塵
客中又過一年春
餘寒漠漠城南路
只見鞦韆不見人

秋思

烏柏微丹菊漸開
天高風送雁聲哀
詩情也似并刀快
剪得秋光入卷來

春晚出遊

風急名花紛絳雪土鬆香草出瑤簪且呼野艇西村去
未必微雲便作陰

溪月

天風吹髮冷颼颼獨向沙邊上釣舟愁絕平羌江上月
向人依舊半輪秋

雨後

雨後涼生病體輕閒拖拄杖出門行槐花落盡桐陰薄
時有殘蟬一兩聲

感昔

白帝城邊鶯亂啼
憶騎瘦馬踏春泥
老來感舊多悽愴
孤夢時時到灤西

柳橋

村路初晴雪作泥
經旬不到小橋西
出門頓覺春來早
柳染輕黃已蘸溪

倚橋二首

錄一首

曲曲闌干縹緲間
哦詩本欲破除閒
無端又起天涯感

淡墨生綃數點山

夢中作

野鶴翩躚啄粒微
碧桃縹緲著花稀
海山又見春風到
丹竈苔封人未歸

出遊卧歸得雜詩

久讀仙經學養形
未容便應少微星
一枝新鍛金鴉觜
更向名山劖茯苓

縱筆

騎鶴翩翩過月傍浩然風露九秋涼
忽聞捲地潮聲起始覺江山近故鄉

春日雜興

行人陌上思悠悠十里斜陽古渡頭
一片落花無覓處只教芳草管閒愁

湖上晚望

閒人無處破除閒待得漁舟一一還
峰頂夕陽煙際水分明六幅巨然山

梅市書事

羸馬孤愁不可勝
小詩未忍付曹騰
一聲客枕江頭雁
數點商船雨外燈

揚萬里

題照上人迎翠軒

寺外秋山觸眼明
寺根秋水洗心清
晴嵐暖翠來未了
不用高人倒屣迎

閒居初夏午睡起二絕句

梅子留酸軟齒牙芭蕉分綠與窗紗日長睡起無情思
閒看兒童捉柳花

松陰一架半弓苔偶欲看書又嬾開戲掬清泉灑蕉葉
兒童誤認雨聲來

早行鳴山

淡淡清霜薄薄冰曉寒端為作新晴殷勤喚醒梅花睡
枝上春禽一兩聲

都下無憂館小樓春盡旅懷

不關老去願春遲，只恨春歸我未歸。
最是楊花欺客子，向人一一作西飛。

金溪道中

野花垂路止人行，田水偏尋缺處鳴。
近浦人家隨曲折，插秧天氣半陰晴。

二月十九日度大庾嶺題雲封寺

梅葉成陰梅子肥，梅花應恨我來遲。
明年若寄江西信，莫折南枝折北枝。

過沙頭

過了沙頭漸有村地平江濶氣清溫暗潮已到無人會
只有篙師識水痕

三月晦日遊越王臺

越王臺上落花春一掬山光兩袖塵隨分杯盤隨處醉
自憐不及踏青人

出真陽峽

今歲春風漲又銷水痕猶印石間茅浮槎却被春流誤

長挂江邊小樹梢

春光濃裏更江行
畫舫分明似水亭
出了青陽恰惆悵
數峰如筍雨中青

碧落洞

夢中曾泊洞前船
落絮飛花是去年
今日來尋船泊處
一江風雨草連天

寒食雨中同舍約遊天竺得絕句呈陸務觀

小溪曲曲亂山中
漱水濺濺一線通
兩岸桃花總無力

斜紅相倚卧春風

晚出淨慈送林子方

畢竟西湖六月中風光不與四時同
接天蓮葉無窮碧映日荷花別樣紅

煙林曉望

一疊青山一疊煙橫鋪平野有無間
直成萬丈鴛溪絹畫出江西秋曉山

宿新市徐公店

籬落疎疎一徑深
樹頭新綠未成陰
兒童急走追黃蝶
飛入花來無處尋

發慈湖過烈山望見歷陽一帶山

夢繞天津月再彎
慈湖解纜已開顏
淮山到眼渾相識
直北青梢是定山

東園垣隅雙松可愛栽
醱醱金沙以繞之

雙松樹子碧團欒
紅錦纏頭白錦冠
儘放花枝過牆去
不妨分與路人看

山莊李花

山莊又報李花穠
火急來看細雨中
除却斷腸千樹雪
別無春恨訴東風

虞允文

瀘江亭

映水林巒影顛倒
濟川舟楫勢崢嶸
東行萬里欲乘興
更待一篙春水生

張孝祥

蘄春道中

霜淨波平水落灣
我行正在畫圖間
簾鉤不用怕風日
且看江南江北山

題夏氏莊

平湖漠漠雨霏霏
壓水人家燕子飛
欲向湖東問春色
杏花無數點征衣

入桂林歇滑石驛題碧玉泉

百折崎嶇嶺路頭
一環清駛石間流
須君淨洗南來眼

此去山川勝北州

李燾

龍鵠山房

已作清時鳥倦飛
杜鵑更勸阿誰歸
似嫌住處猶城郭
不解攜家隱翠微

洪邁

問鑄堂

澤國春寒未見花
一江流水夕陽斜
我來試上津頭望

問鑄堂前有幾家

朱熹

夜聞子規

幽林欲雨氣含淒
春晚端居園徑迷
獨向高齋展衾卧
南山夜夜子規啼

夜雨二首

擁衾獨宿聽寒雨
聲在荒庭竹樹間
萬里故園今夜永
遙知風雪滿前山

故山風雪深寒夜只有梅花獨自香
此日無人問消息不應憔悴損年芳

梅花

幽壑潺湲小水通茅茨煙雨竹籬空
梅花亂發籬邊樹似倚寒枝恨朔風

寄諸同僚

把酒江頭煙雨時遙知江樹已芳菲
應憐倦客荒茅裏落盡梅花未得歸

涉澗水作

幽谷濺濺小水通
細穿危石認行蹤
回頭自愛晴嵐好
却立灘頭數亂峰

小盈道中

今朝行役是登臨
極目郊原快賞心
却笑從前嫌俗事
一春牢落閉門深

春日

勝日尋芳泗水濱
無邊光景一時新
等閒識得東風面

萬紫千紅總是春

觀書有感二首

半畝方塘一鑑開，天光雲影共徘徊。
問渠那得清如許，為有源頭活水來。

昨夜江邊春水生，蒙衝巨艦一毛輕。
向來枉費推移力，此日中流自在行。

示西林可師二首

身世年來欲兩忘，一春隨意住僧房。
行逢舊隱低回久

綠樹鶯啼清晝長

幽居四畔只空林
啼鳥落花春意深
獨宿塵龕無夢寐
五更山月照寒衾

昨夕不知有雪而晨起四望遠峰皆已變色再用元韻作兩絕句

朔風吹盡暮雲平
室煖爐紅睡達明
但怪朝來滿山白
不知昨夜打窗聲

千林無葉一川平
萬壑瓊瑤照夜明
未覺殘梅飄落盡

只愁羌管不成聲

入瑞巖道間得四絕句呈彥集充父二兄

憶昔南遊桂樹陰
歸來遺恨滿塵襟
籃輿此日無窮思
萬壑千巖秋氣深

翩翩一馬兩肩輿
路轉秋原十里餘
共說前山深更好
不辭迢遞款禪居

清溪流過碧山頭
空水澄鮮一色秋
隔斷紅塵三十里
白雲黃葉兩悠悠

風高木落晚秋時
日暮千林黃葉稀
祇有蒼蒼谷中樹
歲寒心事不相違

偶題

擘開蒼峽吼奔雷
萬斛飛泉湧出來
斷梗枯查無泊處
一川寒碧自縈回

用西林舊韻二首

一自籃輿去不回
故山空鎖舊池臺
傷心觸目經行處
幾度親陪杖屨來

上疏歸來空皂囊未妨隨意宿僧房
舊題歲月那堪數
慚愧平生一瓣香

後洞雪壓竹枝橫道

石灘聯騎雪垂垂已把南山入小詩
後洞今朝逢折竹
却思聯騎石灘時

壁間古畫精絕未聞有賞音者

老木樛枝入太陰蒼崖寒水斷追尋
千年粉壁塵埃底
誰識良工獨苦心

霜月次擇之韻

蓮花峰頂雪晴天
虛閣霜清絕縷煙
明發定知花簌簌
如今且看竹娟娟

蓮花峰次敬夫韻

月曉風清隋白蓮
世間無物敢爭妍
如何今夜峰頭雪
撩得新詩續舊篇

殘雪未消次擇之韻

脚底悲風舞凍鴉
此行真是躡蒼霞
仰頭若木敷瓊蕊

不是人間玉樹花

林間殘雪時落鏘然有聲

青鞋布韞踏瓊瑤十里晴林未覺遙忽復空枝隨殘雪
恍疑鳴璫落叢霄

福嚴寺回望瀑布

昨夜相攜看霜月今朝誰料起寒煙安知明日千峰頂
不見人間萬里天

晚霞

日落西南第幾峰
斷霞千里抹殘紅
上方傑閣凭欄處
欲盡餘暉怯晚風

過高臺攜信老詩集
夜讀上封方丈次敬夫韻
十年聞說信無言
草草相逢又黯然
借得新詩連夜讀
要從苦淡識清妍

醉下祝融峰作

我來萬里駕長風
絕壑層雲許盪胸
濁酒三杯豪氣發
朗吟飛下祝融峰

讀林擇之二詩有感

筍輿隨望入寒煙每誦君詩輒黯然
今夜定知連榻夢
一時飛隴錫山前

竹輿傲兀聽嘔啞合眼歸心已到家
遊子上堂慈母笑
豈知行李尚天涯

次韻擇之懷張敬夫

往時聯騎向衡山同賦新詩各據鞍
此夜相思一杯酒
回頭猶記雪漫漫

宿新喻驛夜聞風鐸

倦枕敲眠到五更却嫌風鐸久悲鳴恍疑締綵南鄰夜
寒鐵丁東客夢驚

題萬安野館

身似孤雲去復還投裝猶記此窗間只應煙雨蒼茫外
即是當時萬疊山

萬安遇長沙便欲附書不果

長沙一別兩悠悠夢想清湘帶橘洲欲寄行人數行字

行人不肯作書郵

過樟木鎮晚晴二首

朝晴遣我看薌林頃刻浮雲萬里陰拂袖凌風三十里
依然寒日照長吟

飛雲極目疑梅嶺落日回頭夢橘洲從此不愁東路永
祇應西望轉悠悠

赤岡頭望遠山作

曉起清江弄小舟晚風吹過赤岡頭遠峰自作脩眉斂

萬里那知客子愁

次韻擇之漫成

落日清江更遠山
遠山猶在有無間
不須極目傷懷抱
且看漁船近往還

竹節灘

船下清江竹節灘
長煙漠漠水漫漫
人家斷岸斜陽好
客子中流薄暮寒

次韻擇之舟中有作二首

一江煙水浩漫漫昨夜扁舟寄此間
共向船頭望南北不知何處是家山

一席三人抵項眠心知蓬外水如天
起來却怪天如水月落烏啼浦樹邊

次韻擇之進賢道中漫成五首

錄二首

白酒頻斟當啜茶何妨一醉野人家
據鞍又向岡頭望落日天風雁字斜

誰作窗間擁鼻聲更哦樂府短歌行
從教永夜清無寐

只恐晨雞不肯鳴

次韻擇之金步喜見大江有作

江頭四望遠峰稠
江水中間自在流
並岸東行三百里
水源窮處即吾州

次韻擇之餘干道中

寒盡春生草又青
化工消息幾曾停
因君一詠陵陂麥
恍憶儂家老圃亭

亭下予家種麥處也

野望

登高立馬瞰晴川四面平林接暝煙東望不堪頻極目
歸心已度鳥飛前

山茶

江南池館壓深紅零落荒煙細雨中却是北人知愛惜
數枝和雪上屏風

夜聞擇之誦師曾題畫絕句遐想高致偶成小
詩

一幅瀟湘不易求新詩誰遣送閒愁遙知水遠天長外

更有離騷極目秋

送林擇之還鄉赴選

門外槐花似欲黃
高堂應望促歸裝
箇中自有超然處
肯學兒曹一例忙

今朝握手送君歸
馬上薰風拂面吹
不用丁寧防曲學
寒窗久矣共心期

次彭應之魚樂亭韻

亭前活水破輕冰
漸見遊鯈傍石稜
老子自知魚樂處

不須莊惠與同登

次劉彥集木犀韻

衆芳搖落九秋期
橫出天香第一枝
莫似寒梅太孤絕
更教遙夜笛中吹

秋到寒巖桂樹叢
小山吟罷思悲翁
不妨更作淹留計
占取人間十里風

寄謝劉彥集菖蒲之貺

君家蘭杜久萋萋
近養菖蒲綠未齊
乞與幽人伴岑寂

小窗風露日低迷

寄吳公濟兼簡李伯諫

客子歸來春未深，祇應寒雨罷登臨。
閒窗竟日焚香坐，一段孤明見此心。

三徑莓苔書掩闕，君來問道却空還。
從今蠟屐應無恙，有興何妨再入山。

唐石雪中

春風欲動客辭家，霖潦縱橫路轉賒。
行到溪山愁絕處，

千林一夜玉成花

崇壽客舍夜聞子規得三絕句寫呈平父兄煩
為寄彥集兄及兩縣間諸親友

空山初夜子規鳴靜對琴書百慮清
喚得形神兩超越不知底是斷腸聲

空山中夜子規啼病怯餘寒覓故衣
不為明時堪眷戀久知岐路不如歸

空山後夜子規號斗轉星移月尚高
夢裏不知歸未得

已驅黃犢度寒臯

戲贈勝私老友

槐花黃盡不關渠老向功名意自疎乞得山田三百畝

青燈徹夜課農書

勝私先侍講嘗著農書三卷

晚雨涼甚偶得小詩請問遊山之日并請劉平

父作主人

幾年不踏仙洲路夢入青藤古木間好趁新秋一番雨
晝寒亭下弄潺湲

黎嶺西南水石佳處不減廬阜戲呈子厚

谷深石瘦水潺潺便是楞伽折桂間珍重下邳圯上客
一年幾度到廬山

次呂季克東堂九詠

錄三首

愛蓮

聞道移根玉井傍開花十丈是尋常月明露冷無人見
特為先生引興長

月臺

臺上無人伴苦吟歸鴉過盡日西沈須臾玉匣開塵鏡
却有孤光共此心

海棠屏

蜀樹成行翠作圍花開時節更芳菲主人夢亦尋春去
栩栩深穿錦幃飛

至鳳凰山再作

門前寒水青銅闕林外晴峰紫帽孤記得南垞通柳浪
依稀全是輞川圖

次劉正之芙蓉韻

淺綠深紅出短籬
望中都是可憐枝
要看亂颭寒塘水
更待金風滿意吹

次韻擇之發臨江

千里煙波一葉舟
三年已是兩經由
今宵又過豐城縣
依舊長江直北流

次二友石井之作

一竇陰風萬斛泉
新秋曾此弄清漣
人言湛碧深無底

只恐潛通小有天

泉嵌側畔一川明
水石縈迴更有情
聞說近來疏葺好
想應仍是舊溪聲

益公道人相見信安道
溫陵舊遊出示近詩次韻

別來幾度見歸鴻
歲月悠悠一夢中
莫道相望湖海濶
爭知千里不同風

一身千里伴征鴻
北去南來羈旅中
珍重故人相認得

新詩重舉舊家風

劉子澄遠寄羊裘且有懷仁輔義之語戲成兩絕為謝以發千里一笑

短棹長蓑九曲灘
晚來閒弄釣魚竿
幾回欲過前灣去
却怕斜風特地寒

誰把羊裘與醉披
故人心事不相違
狂奴今夜知何處
月冷風淒未肯歸

過蓋竹作二首

二月春風特地寒江樓獨自倚闌干箇中詎有行藏意
且把前峰細數看

浩蕩鷗盟久未寒征驂聊此駐江干何時買得漁船就
乞與人間畫裏看

戲答楊庭秀問訊離騷之句

昔誦離騷夜扣舷江湖滿地水浮天只今擁鼻寒窗底

爛却沙頭月一船

佛法不怕爛却禪家語也

奉和子服老弟黃楊游巖二詩

錄一首

聞道黃楊山上頭千峰環抱百泉幽羨君拄杖年年去
飽看人間萬頃秋

寄江文卿劉叔通

我窮初不為能詩笑殺吹竽濫得痴莫向人前浪分雪

世間真偽有誰知

僕不能詩往歲為澹菴胡公以此論薦平生僥倖多類此云

梅

姑射仙人冰雪容塵心已共彩雲空年年一笑相逢處

長在愁煙苦霧中

趁韻

千山木脫但空林
天外哀鴻亦叫音
認取溪亭今日意
四更山月湧波心

吳山高

行盡吳山過越山
白雲猶是幾重關
若尋汗漫相期處
更在孤鴻滅沒間

夜

獨宿山房夜氣清
一窗涼月共虛明
鄰雞未作人聲絕

時聽高梧滴露鳴

題中峰杉徑

盤回山腹轉修蛇
橫入中峰小隱家
好把穉杉緣徑插
待迎涼月看清華

蘭

謾種秋蘭四五莖
疎簾底事太關情
可能不作涼風計
護得幽香到晚清

水口行舟二首

昨夜扁舟雨一蓑滿江風浪竟如何今朝試捲孤篷看
依舊青山綠樹多

鬱鬱層巒夾岸青春山綠水去無聲煙波一棹知何許
鷓鴣兩山相對鳴

題嚴居厚溪莊圖

平日生涯一短篷只今回首畫圖中平章箇裏無窮事

要見三山老放翁

謂陸務觀時嚴居厚之官剡中

呂祖謙

春日

短短菰蒲綠未齊
汀洲水暖雁行低
柳陰小艇無人管
自送流花下別溪

簷鐸無聲鳥語稀
徑深鐘梵出花遲
日斜遍繞谿南寺
未信東風屬酒旗

張栻

謝邢少連送葡萄豆寇栽

君家小圃占春光
眼看龍鬚百尺長
移向樓邊並寒井

明年垂實更陰涼

夜得嶽後菴僧家園新茶甚多輒分數椀奉伯
承

小園茶樹數十許走寄萌芽初得嘗雖無山頂煙嵐潤
亦有靈泉一派香

筠州曾使君寄貺中州新芽賦此以謝

黃蘗山前水遠沙春風吹石長靈芽午窗落磴飛瓊屑
烏椀翻湯湧雪花

仲春有懷

西湖景物元瀟灑
楊柳新來兩岸垂
亦有遊人往來否
不應閒過看花時

登樓

風雨經旬只閉門
朝來倚檻已春深
不知花片飛多少
但覺江城滿綠陰

題城南書院

新竹成林蕉葉青
隔籬深處有蟬鳴
晚涼更覺長堤靜

自遶荷花待月明

秋後冬前一月晴
小園佳處日經行
半山木落樓臺露
幾樹霜餘橘袖明

曉來天氣更清新
獨倚闌干正暮春
花落花開鶯自語
東風吹水細鱗鱗

並湖數畝新疏闢
便有魚兒作隊行
我亦隨流浮小艇
晚涼細看縠紋生

疎竹蕭蕭正雨聲
眼中日影又還晴
釣窗燕坐夏將半

荷葉已香湖水清

睡覺西山月正平
荷香不斷晚涼生
園中雙鶴知人意
已作金風警露聲

臘月二日攜家城東觀梅夜歸

前日看花正薄陰
重來晴日更精神
莫教容易飛花片
且放千林自在春

題庾樓

南瞻廬阜北淮山下有
長江萬頃寒往事無邊
隨去浪

西風有客傍闌干

立春日禊亭偶成

律回歲晚冰霜少
春到人間草木知
便覺眼前生意滿
東風吹水綠差差

和陳擇之春日四絕

錄三首

花落花開總可憐
嶠南亦復好風煙
雨餘起我故園夢
漠漠浮鷗水拍天

年華冉冉春將半
花事怱怱雨滿城
想復東郊變新綠

未妨攜酒趁初晴

日長漸有簡編樂春半已將櫻筍來無數青山相慰藉
有時明月共徘徊

和朱元晦韻

一見瓊山眼為青馬蹄不覺渡沙汀如今誰是王摩詰
為寫清新入畫屏

王十朋

次韻潘先生寒食有感

無賴楊花趁暖風
旅中節物與愁逢
一聲杜宇啼春怨
知在花梢第幾重

過盤山宿旅邸

一嶺迢迢十里賒
行人半日踏煙霞
青山遮莫盤千匝
歸夢何曾不到家

鑑湖

胸中萬頃元才子
方外孤標賀季真
鑑水縈回三百里
風流何止兩唐人

萼湖

水晶銀線滿湖中
遙與吳江氣象同
我輩他年厭游宦
思歸應不待秋風

府帥王公中秋宴客蓬萊閣分茶賞月于清白亭某以幕僚與焉

白髮青衫老幕官
蓬萊秋月兩年看
興來端欲乘風去
不怕瓊樓玉宇寒

寶月師刻予舊題以寄因書絕句

冊府經年已倦遊，夢魂隨雁到峰頭。
山中老宿如相問，為道歸期不待秋。

左嶺

北望吾廬山最好，南通蕭寺境逾幽。
白雲夜向原中宿，幾度隨人過嶺頭。

蘆花

蘆花兩岸風蕭瑟，渺渺煙波浸秋日。
鷗鷺家深不見人，小舟忽自花中出。

初九日離南用夔州船

扁舟經月泝江流
又向江陵換蜀舟
腸斷一聲離岸櫓
不堪回首仲宣樓

夢覺偶成

蚤秋良夜月朦朧
夢覺涼生枕簟中
數點過雲簷外雨
一聲落木隴頭風

吳儆

寓郡城客舍熱不可寐與程彥舉坐語達旦

淡月微雲對倚樓無聲河漢自西流高城忽起梅花弄
散作晴空萬里秋

壬午二月桃方盛開雪積其上光輝紅潤不可
形狀詩以紀之

粲粲乘鸞萬玉妃肯將紅艷鬪光輝只應侍宴瑤池罷
猶帶天邊醉色歸

偶成

宵來一雨破炎蒸蕉葉葵榴照眼明稍與燈花尋舊約

却嫌庭樹作秋聲

寓壺源僧舍二絕

殘燈掩卷已三更
風露涓涓月滿庭
間撲流螢衝暗樹
危梢點點落寒星

歸來閉戶還高枕
窗隙微通月影斜
風急忽驚烏鵲起
空階簌簌墮松花

王阮

留別昌國

扶桑曾見日騰空
老去歸田不復東
一覺短簷他日夢
起來惆悵晚窗紅

洞庭留別

嶺松歲古欲無根
水石秋深未有痕
無限好山將不去
又移帆影過前村

見梅有感

十月瀟湘盡放梅
南枝曾避北枝開
客愁無奈春消息
腸斷江南驛使來

林光朝

代陳季若上張帥

柳堤九曲暗青絲
畫戟叢中畫影遲
傳說姑蘇新樂府
祇緣太守例能詩

薛季宣

青田同七五兄作

浩歌款乃客消魂
一抹煙林暝遠村
花為忘憂人一笑
不知風雨作黃昏

邨居秋暮

風回偃水縠紋平
林末他山筆架橫
場圃未閒黃葉下
鶉鳩啼雨忽啼晴

陸九淵

晚春出箭溪

晴雲冉冉薄斜暉
春靜衡門半掩扉
風入墻頭丹杏晚
高枝頻颭亂花飛

王希呂

夏日入直

玉堂晝永暑風微
簌簌飛花落小池
徙倚幽欄憑問訊
夏鶯飛出萬年枝

劉燾

皇帝閣春帖子詞

東風昨夜入簾帷
便覺深宮漏影遲
一曲涼州花盡放
不須更作報春詩


柳眼窺春暖欲眠
梅芳點雪鬪新妍
一年好處如今是

還勝清明寒食天

御選宋詩卷七十

謹案第十六頁後一行斜紅相倚卧春風刊本斜
訛卧據誠齋集改

第三十四頁前三行四更山月湧波心刊本山訛
三據朱子大全集改



總校官庶吉士 臣侍 朝
校對官檢討 臣蕭九成
騰錄舉人 臣張 昱